

« Tres euros de retroceso »

Tomás, fíu del "Cascáu";
anda siempre a sos deleres,
xugando, diendo a mueres
y tando siempre enfiláu.

Si la muer nun tá atenta
a la hora de cobrar,
ni un euro va catar
pues gasta más de la cuenta.

Foi dende'l Pino, al Carmin
caminando pela cera,
bien emllena la cartera,
con Gregoriu el so vecín.

Fuvo hasta terdi soplando,
gastando perres sin tasa
y a les cuatro, al dir pa casa
nun taba pa dir andando.

Entá atopó un taxista.

Preguntó-y yá fartu vino:

- ¿Pue baxame usté hasta'l Pino
en un momentín artista?.

Montó y na más llegar
diz-y: - ¿Qué val la carrera?,
chando mano a la cartera
disponiéndose a pagar.

- Son cinco euros na más.

Como ves ye poca cosa
baxar dende Felechosa.

Entós contesta-y Tomás
viendo que tá desperráu
al taxista: - Oye, verás,
¿pues dar tres euros pa tras?.

Sólo traigo dos saláu.

« La pescaora »

El deporte de Dariu
de siempre, foi el pescar;
casi siempre per el ríu
y dalguna vez nel mar.

Siempre quixo compartir
l'afición con él, so Charo,
y que nun podía dir,
siempre-y lo dixo bien claro.

Pero ella dió-y la lata,
nun paró, siguió insistiendo
y tanto rica-y la pata,
a pescar terminó diendo.

Compró botes y una cama
y Dariu y la muer,
fueron pa baxu Cabana
de pesca, nel ríu Ayer.

L'home, a gustu nun taba
pero de sobra sabía,

que a la so Charo-y gustaba
y aguantóla ellí tol día.

Al volver, víblos Tulema
pasar per onde la plaza
y como sabe del tema,
preguntó-y a la rapaza:

- ¿El enfadu yá-y pasó
por llevate?. Dí, ¿qué tal?.

Y diz Charo: - ¿Qué va ho!.

Fixelo al paecer too mal.

Falé - dixo - endemasiau.

Fixe ruíu ensin cuartel.

Nun punxe'l cebu adecuáu
y además pesqué más qu'él.

Fernando Suárez Albalá